

solche Eisen getragen hat / kan es so dann mit ganzen Eisen beschlagen werden / sie müssen aber fein breit seyn / damit der Horn sich darnach ausbreiten / vnd wachsen könne.

Wann ein Pferd sich streichet.

Dies ist ein anzeigen grosser Schwachheit / vnd dergleichen Ross werden immerdar auffstössig seyn / vnd haben nidere Fessel vnd Versen / auch schlechte Schenckel / werden gemeiniglich linck seyn : vnd so ein Pferd sich im Schritt gehen streichet / vielmehr wird es im traben thun / weil es mehr stärck darzu brauchen / vnd sich härter bemühen muß ; einem solchen Pferd zuhelffen / solle der Horn auff der lincke n. seiten etwas mehr weggenommen / vnd entgegen das Eisen auff der rechten seiten höher gericht / vnd ohne Stollen gemacht werden.

Wann ein Pferd gar zu weit mit den Füßen von einander gehet.

Dieser Mangel kan den Pferden herkommen / daß sie entweder von Natur schwach vnd matt seyn / oder / daß sie an steinigen harten Orten gefallen / vnd / weilen sie vnbeschlagen gewesen dorten erzogen vnd auffgebracht worden / daß sie auch die Fuß zertretten vnd verderbet haben. Diesem abzuhelffen / solle man es mit Eisen / die hinden Stollen haben / beschlagen / vnd die Versen nider aufschneiden ; so sie aber schadhafft vnd gebrochen wären / muß man sie salben vnd erkülen : Daher ist es wol gethan / daß die jungen Pferd Sommerszeiten in ein fließend frisches Wasser / bis an den Bauch geführet vnd gestellet werden / dann also erkühlen sie sich vnd bekommen gute Hüß.

So ein Pferd linck ist.

In solches Pferd muß offte beschlagen / vnd die hindere Horn außwendig beschnitten / also der Fuß vergleicht / vnd zurecht gebracht / auch das Eisen auff selber seiten dicker gemacht werden / doch soll man zusehen / daß man nit zu viel von dem Horn nemme / damit mans wol beschlagen könne / vnd nit vernagle.

Wann ein Pferd die hindern Fuß mit recht vnd wol auff die Erde setzet.

Auff solchen Fall / sollen an das Eisen hinden zwey hohe Stollen gemacht / vnd der Horn vornen herabgenommen / oder etwas nider beschnitten werden.

Wie